

Tractar mintgin cun respect

John Edwards sco vice da John Kerry

DA GUIU SOBIELA-CAANITZ

■ **I s'avischina l'elecziun presidenziala americana. Il pievel da mintgin dals 50 stadis federativs e da la chapitala federala elegia en november l'organ collegial che tscherna lu il president, chau dal stadi e da la regenza, e la persuna che duai al substituir en cas da basegn.** Il u la vice, sco in battasenda, sto sa tegnair «adina pront»; quai ha sa verifitgà cur ch'in president è mort da malsogna (1945), è vegnì mazzà (1963) u ha stuì sa retrair (1974). I constat dapi mais che John F. Kerry, senatur da Massachusetts, candidescha per la presidenza cunter George W. Bush, titular da l'uffizi. Pir dapi ils 6 da fanadur san ins che Kerry giavischa sco vice John Edwards, advocat e senatur da la Carolina dal nord. Ils mezs da massa han derajà il maletg d'in Kerry bainvulent e maiestus, cun ses 1,93 m, pia ina varianza amiaivla da Charles de Gaulle, sper in Edwards giuvenil e traglischant che malgrad ses 51 onns para quasi il figl da Kerry. Ils 26 da fanadur a Boston, chapitala da Massachusetts, vegn il di da la Partida democrata (PD) segir a confermar lur candidatura. Ma pertge vul Kerry gist quest partenari? Quai san ins chapir endretg mo tirond endament il passà e la structura sociala dals SU.

Il Sidost sco atgna regiun

Il Massachusetts e la Carolina dal nord han fundà ils Stadis unids (SU), ensemen cun auters stadis atlantics. Ins n'astga dentant betg emblidar che la Carolina dal nord, ensemen cun auters stadis, ha fundà 1861 ils «Confederate States of America» che tanschevan da las portas da Washington enfin al cunfin da México. Lezs separatists vulevan mantegnair la sclavaria dals nairs, abolida 1862 dals SU. Era quests han pia gù lur guerra da la Lia separada; lez conflict sanguinus è vegnì a fin 1865 cun la disfatta militara dals «confederads». Tarblers alvs dals stadis dal «South» u plitost Sidost è restada in'amezza profunda fin tard en il 20avel tschientaner. Là, en ils onns otganta e novanta han bleras cumanzas cristianas fundamentalistas svilupadas en il senn da la «revoluziun moral» predeggiada da gruppas pussantas da la Partida republicana



Ins spera ch'Edwards megliereschia las vistas da Kerry en il Sidost, cunzunt tar la populaziun da derivanza africana.

KEYSTONE

(PR). Tuts stadis antruras «confederads», dano il Tennessee cun il democrat Phil Bredesen, han oz in guvernatur masculin da la PR; en Florida sa tracti d'in frar da Bush. Dentant è la minoritad democrata da lezs stadis vegnida pli pussanta aifer la PD. Ils democrats dal Sidost Jimmy Carter (Georgia) e Bill Clinton (Arkansas) èn vegnids presidents dals SU.

Manar piazzas da lavur

Ins spera ch'Edwards megliereschia las vistas da Kerry en il Sidost, cunzunt tar la populaziun da derivanza africana. Gist questa gruppa vegn strusch a sustegnair Bush. Quest ha bain singuls collavuratur nairs, ma vegn ferm crititgà da las organizaziuns da lezza minoritad, schizunt la venerabla «National Association for the Advancement of Colored People», fundada 1909, che stimule-

cha ils burgais nairs a far diever da lur dretgs electorals. Edwards ha declerà a «Newsweek» dals 19 da fanadur: «La glied dal Sid (...) crai en la sinceradad. Ella crai ch'ins duaja tractar mintgin cun respect e che mintgin duaja pudair far quai ch'el è abel da far» (p. 21). Questas duas frusas cuntengnan trais criticas a Bush. Lez n'è betg stà sincer cur ch'el ha pretais ch'i dettia armas da destrucziun massiva en l'Irac. Sia schuldada ha tractà praschuniers iracais senza respect. Cun sia politica economica na pussibiltescha'l da lavurar a tgi che pudess. Kerry en l'intervista cuminaivla a «Newsweek»: «Nus lain discutir ils mezs da manar vairas piazzas da lavur a la glied da l'America rurala ed en las citads pitschnas, nua che la basa industrial svanescha. Bush na di nagut da quai e na fa nagut en lez connex.» Schizunt Ronald jr. Reagan, figl da l'an-

terieur president Ronald Reagan (1911–2004), numna Bush in manzaser ed ipocrit ed è annunzià sco referent al di da la PD a Boston ils 26 da fanadur.

In provediment social manglus

Kerry ed Edwards vulan tschentar la dumonda sociala amez il cumbat electoral. En lez champ datti propi da crititgar. Quai han ins vesì en zercladur gist avant las elecziuns legislativas canadaisas. Il «welfare state / État providence» è in element essenzial da l'identitad canadaisa en fatscha a la superpussanza limitrofa. Las mancanzas dal provediment social en ils SU han furnì in spaventagl che politichers canadais mussavan adina puspè sco cuncontrast, per relevar ils avantags da la legislaziun en lur pajais. Ils SU èn segir ina gronda democrazia, ma la gistia sociala n'è tuttina betg lur vart ferma. Il politolog Gustav

Schmidt (Universitad da la Ruhr, Bochum) analisescha: «Il vair problem è che 35–43 milliuns Americans sut 65 (14–18% da questa categoria) n'è betg segirada encunter malsognas. In motiv è che firmas cun pli pauc che 100 lavurers porschan ina terza part da las piazzas da lavur, ma be la mesadad da lezzas firmas po segirar ses personal encunter malsognas. Ina segunda gruppa da lavurers senza segiranza da malsauns cumpiglia glied che gudogna memia pauc per sa prestar ina tala (...). Ina terza gruppa furman uffants e giuvenils sut 24. La davosa cumpiglia personas cun entradas annualas d'almain \$ 50 000 che pudessan sa prestar ina tala segiranza, (...) ma che na vulan pajar premias uschè autas en ina cassa ch'austra glied possia trair a niz. 39% da las famiglias senza segiranza da malsauns han entradas annualas tranter \$ 20 000 e 50 000. Sco emploiads, per part en piazza parziala, na sani pajar premias per lur famiglias ord atgnas resursas. I basegnan segiranzas favuravlas organisadas da lur patruns; ma talas na poni betg pli pajar sch'ìls singuls stadis federativs spargnan las subvenziuns a premias, medischnas u meds d'agid. I basegnass pia in sectur sanitar pajabel, fundà sin ina legislaziun federala correspodenta (...). Ma igl è grev d'augmentar la part da las expensas publicas vi dal sectur sanitar. Questa part è creschida da 39,6% (1990) a 44,3% (2000) (...). Per distgargiar ils pensiunads da las segiranzas supplementaras per medischnas che pretendan in recept dal medi, per tgras ambulantas, ospitalisaziuns pli lungas euv., preves'ins in surpli d'expensas da \$ 380 – 450 milliardas per la perioda 2004–2013. Qua duaj'ins tscherner tranter ina chargia pli gronda per ils daners da taglia (forsa 45% empè da var 30% ussa) e refurmas per sminuir ils custs*. Ils SU dumbran 285 milliuns olmas. Tals problems n'èn betg uschè esters per nus. I vegnan ad occupar il pievel dals SU durant ils proxims mais. En quest senn è Edwards segir cumpetent, pervi da sia derivanza modesta e da sia famigliarità cun ils problems dal mintgadi.

(* Gustav Schmidt, *Geschichte der USA. Darmstadt (Wissenschaftliche Buchgesellschaft, ISBN 353413835-X) 2004, pp. 209-210.*